

UMS cadang tingkat bilangan pelajar antarabangsa

UB 21.10.2014 A2

Oleh S.CONNIE PEARL SUIL

KOTA KINABALU: Universiti Malaysia Sabah (UMS) bercadang meningkatkan bilangan pelajar antarabangsa untuk melanjutkan pengajian di universiti itu.

Pengarah Urusan Pusat Hubungan Pelajar Antarabangsa, Molly Donna Awang Sham berkata kokurikulum UMS akan diselaraskan dengan sistem pendidikan di seluruh dunia tidak lama lagi dan dijangka akan menarik lebih ramai pelajar antarabangsa ke UMS.

Beliau yang mewakili Naib Canselor Prof Datuk Dr Harun Abdullah berkata demikian

pada majlis yang menyambut 72 pelajar China dan Kemboja bagi program persediaan Bahasa Inggeris (IEPP) kelmarin.

“Kita juga mengalu-alukan seramai 25 pelajar antarabangsa yang terdiri daripada 69 pelajar China dan tiga pelajar dari Kemboja ke dalam program ini.

“Ini juga adalah kali pertama pihak universiti mengalu-alukan kedatangan pelajar dari Kemboja,” katanya.

Menurut Molly, program IEPP distruktur untuk membantu pelajar antarabangsa bagi memahami bahasa Inggeris serta membolehkan mereka mengikuti kursus pilihan di universiti itu.

Sementara itu, Pengurus Urusan UMS Link Holdings Sdn Bhd Ramlan Awang Ali berkata, program IEPP dimulakan sejak tahun 2003 untuk membantu pelajar antarabangsa yang tidak mempunyai asas awal Bahasa Inggeris bagi melanjutkan pengajian di UMS.

Beliau turut menggalakkan agar semua pelajar yang baharu mendaftar itu dapat menyesuaikan diri dengan budaya di negara ini selain berdikari, proaktif dan sentiasa berfikiran terbuka.

Tambahnya, mereka juga akan dibantu oleh guru-guru yang berpengalaman serta kakitangan yang terlatih untuk

membimbing mereka dalam program terbabit.

Dalam pada itu, Ramlan turut menekankan kepentingan bahasa Inggeris dalam pasaran kerja yang mencari graduan dengan pengetahuan serta kemahiran seperti berkomunikasi dengan baik, mampu bekerja di bawah tekanan serta dalam satu pasukan.

“Bahasa Inggeris adalah bahasa yang digunakan secara meluas di dunia sama ada dalam perniagaan mahupun industri...justeru ia memerlukan kemahiran dalam bahasa ini di samping membantu untuk memajukan kerjaya anda,” katanya.



PELAJAR antarabangsa yang baharu mendaftar di UMS merakamkan gambar kenangan dengan kakitangan UMS.